

Inatsisartut Ombudsmandiata 2019-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiffigisassaattut siunnersuut.
(Inatsisinut Ataatsimiititaliaq)

Akissuteqaat

(Naalackersuisut Siulittaasuut)

Siullermeerneqarnera

Aallarniutigalugu Ombudsmandip 2019-imut ukiumoortumik nalunaarutaanut aammalu ombudsmanditut atorfimmini suliarinikuusai pillugit ombudsmandi qutsavigerusuppara.

Naalackersuisut nalunaarut soqutigalugu atuarpaat maluginiarsimallugulu sulisunut suliani aqutsinikkut aalajangikkanik oqartussaasunut qulliunerusunut ingerlatitseqqittarneq ombudsmandip sammisimagaa. Ajoraluartumik sulisunut suliani aqutsinikkut aalajangikkanik oqartussaasunut qulliunerusunut ingerlatitseqqittarnermi qanoq iliortoqassanersoq ersernerlussimavoq.

Taamatut ersernerluttoqarnera tunggavigalugu Naalackersuisut Siulittaasuata Naalackersuisoqarfia kaajallaasitamik nutaamik – Namminersorlutik Oqartussat sulisoqarnermut allaffeqarfiani akisussaaffiit piginnaasallu pillugit kaajallaasitaq – ulloq 8. aprili 2020-mi atuutilersumik suliaqarpoq. Maannakkut kaajallaasitami ersarissumik takuneqarsinnaavoq, sulisunut suliani aqutsinikkut aalajangikkanik oqartussaasunut qulliunerusunut ingerlatitseqqittarnermi qanoq iliortoqassanersoq. Taamatut ulloq 8. aprili 2020-mit kaajallaasitaq nutaaq pillugu Naalackersuisut Siulittaasuata Naalackersuisoqarfiata Ombudsmandi ilisimatippaa.

Kingusinnerusukku Naalackersuisut Demokraatinik ilaneqareernerata kingorna Naalackersuisut tamarmik immikkut akunnerminni suliassaqarfiisa nutaat qanoq agguataarneqarneri pillugit aamma allaffeqarfiit immikkoortut sorliit namminersorlutik aqutsisoqarfiunersut Naalackersuisut Siulittaasuata Naalackersuisoqarfiata Ombudsmandi ilisimatippaa. Matuma kingorna aqutsinikkut aalajangikkanik oqartussaasunut qulliunerusunut ingerlatitseqqittarneq pillugu ersernerluttut tamarmik atorunnaarsinneqarput.

Naalackersuisut taamatut oqaaseqarlutik Inatsisartut Ombudsmandiata 2019-imut nalunaarusaata Inatsisartunit tusaatissatut tiguneqarnissaa taperserpaat.